

Excerptum ex epistola P. Josephi Aubery,
Evangelii præconis in Nova Francia, ad
P. Josephum Juvencium, de Mis-
sione S. Francisci Salesii, in
eadem Nova Francia.

GRATULARE mihi, et gratias age Deo, mi Pater: in hac mea Missione tres quatuorue tantum habeo nondum baptizatos: ceteri Christum & virtutem colunt, non tamen sine labore, ut inter barbaros, quibus assidue certandum est cum ebrietate, superbia, et superstitione. Vino semel graves neque rationem, neque pietatis leges ulla audiunt: Sacerdotem, licet bene ac jure admonentem, si præsertim est junior, superbè contemnunt, ac ferociter ut minus sapientem irrident: nam ætas apud illos pars maxima Sapientiæ et auctoritatis est. Somniis vero Suis, et aliis id genus observationibus superstitiosis, miserè addicti sunt. Dices ista non convenire Christianis. Fateor, si tales essent omnes, quales germanos ac genuinos esse Christianos decet: in Europa nostra quam multi Christiani graviora peccant. Christiana lex homines peccati expertes non facit, nec bene agendi necessitatem affert. Tum, uti nos olim in Rhetorica docuisti, *Naturam expellas furca tamen usque recurret.* Contra vitiosam hanc naturam,